

## Novas doctoressas illa Pratcha Zernez

**Da l'on 2015 es gnüda fundada la Grischa Care AG Zernez chi procura culla Pratcha Zernez pel provedimaint medicinic in cumün. Al principi da l'on 2023 cumainzan duos doctoressas la lavur in quella pratcha.**

«Üna pratcha da meidis a Zernez han manà d'ürant blers ons ils meidis Christoph e Claudine Nagy», declera Martin Liesch chi presidescha il cussagl administrativ da la Grischa Care Zernez AG. Il meidi da Schiers es eir commember da la Grisomed, la rait da meidis da chasa grischuna. Da l'on 2021 es il pèr Nagy i in pensiun. «Nus da la Grischa Care Zernez AG vain tscherchè üna o ün successur e vain pudü ingaschar al principi dal 2022 al meidi Dieter Laude.» Quel ha uossa però desdit sia plazza pella fin da quist on. «Per cha'l provedimaint medicinic a Zernez saja inavant garantì, eir davo Büman 2023, vaina tscherchè üna soluziun e chattà uossa üna definitiva.»

### Da Turich e da l'ospital a Scuol

«Nus vaivan gnü fingià plü bod contact cun meidis chi vaivan interess da gnir a lavurar a Zernez», disch Martin Liesch, «e be güst uossa vaina pudü ingaschar a

las duos doctoressas Heike Grossmann Schloeth e Dea Bauer.» Sco ch'el infuorma ha Heike Grossmann manà üna vainchina d'ons insembel cun ün partenari üna pratcha a Turich. «Uossa tscherchaiva ella üna nouva plazza in seis manster, inclur oter. Perche na in ün cumün, varà'la pensà, e s'ha annunzchada pella plazza a Zernez», cuntinescha il meidi da Schiers, «pro Dea

Bauer invezza esa uschea cha seis partenari lavura per l'ospital pro'l Salvamaint Scuol.» Ch'uschea saja ella rivada in Engiadina Bassa ed haja lavurà d'ürant l'ultim on e mez in l'ospital da Scuol, disch el ed agiundscha cha'l pèr abita ad Ardez. «Dea Bauer e Heike Grossmann cumainzan la lavur illa Pratcha Zernez als 2 da schner 2023», infuorma il president dal cussagl ad-

ministrativ da la Grischa Care AG Zernez. El preschainta quista società anonima.

### Accumpli ün'incumbenza

«L'incumbenza da sgürar il provedimaint medicinic da basa a Zernez vaivan differents uffizis ed instituziuns», declera Martin Liesch, «e quists partenaris, ils meidis Nagy, il cu-



La Pratcha Zernez es gnüda integrada i'l complex da la Gruppa da chüra «Röven» dal CSEB. fotografia: Jon Duschletta

mün da Zernez, l'ospital regional a Scuol e la Grisomed han fundà da l'on 2015 la società anonima Grischa Care Zernez AG.» Da quel on vaiva il Center da Sandà Engiadina Bassa (CSEB), al qual fa part eir l'ospital da Scuol, drivi a Zernez la gruppa da chüra «Röven». In quel connex s'haja ponderà schi nu füss pussibel dad intergrar la pratcha chi d'eira avant illa chasa privata dals Nagys in l'edifizi «Röven». Ils meidis Christoph e Claudine Nagy chi d'eiran commembers da la Grisomed han fat müdada cun lur pratcha illa chasa pella gruppa da chüra «Röven». «Els vaivan però fat la cundiziun chi gnia tscherchada üna soluziun perdüraivla e na chi sajan be sulets», explichescha Martin Liesch, «uschea ha surtut Grischa Care AG Zernez la lezcha da procurar pel provedimaint medicinic per Zernez e cumüns vaschins.» La Pratcha Zernez es entrada in vigor al principi da l'on 2016. «Ella sto però gnir serrada da sonda, ils 10 da december fin als 2 da schner 2023», agiundscha'l. Il motiv es cha la tecnica d'infuormaziun per l'elavuraziun digitala da las datas (cuort IT) sto gnir rimplazzada culla IT actuala. «E quai as stoja far cur cha la pratcha es serrada», conclüda Martin Liesch, «in-schinà as ris-cha d'avair caos. Uschea invezza vaina temp avuonda per provar oura cha tuot funcziuna culla nouva IT.»  
Flurin Andry/fmr